

Resun: Radunonza generala dalla Giuru

■ Sonda sera, ils 27 d'avrel 2019 ha la radunonza annuala dalla Giuventetgna Rumantscha (GiuRu) giu liug a Cuera. El Hohenhühweg 4, nua ch'il biro cum-partgiu dalla Giuru sesanfla, havein nus astgau beneventar 17 persunas interessadas ad ina sera emperneivla e fetg informativa. Suenter ina cuorta introducciun essan nus beingleiti vegni tiels rapports annuals dil 2018. L'actura Michelle Parli ha prelegiu il protocol digl onn vargau ch'ei vegnius approbaus unanimamein. Silsuenter havein nus suprastonts dau ina cuorta investa en nos projects ed ellas occurrenzas intereuropeicas, organisadas entras l'uniun tetgala YEN, la giuventetgna europeica da minoritads. Igl onn vargau ha ina tala occurrenza puspè giu liug tier nosta minoritad romontscha, numnadamein a Trin. Medemamein in highlight era l'elecziun da Giuanna Beeli sco presidenta dalla YEN ch'ei succedida al seminari da Pastgas la primavera vargada. Ulteriuras occurrenzas regiunalas eran denter auter il Hackaton a Turitg, la radunonza da delegai dalla Lia Rumantscha a Glion e nossas «scuntradadas cumadeivlas» a Turitg.

Davart lur visetas en Croazia tier la minoritad serba e digl inscunter il pli actual en Rumenia tier la minoritad ungaresa han Angelica Augustin, Asa Hendry e Leta Arpagaus gest sezzas saviu raquintar. Sco mintg'onn havein nus susteniu finanziamein numerus projects da musica e cultura, per exempel il comic «Crestomat», «Miu Mozart» da Quirina Lechmann, la EP «Mona Lisa» da Fiona Cavegn, festivals sco BandXost ed il festival «mund romontsch» che vegn ad haver liug igl atun a Flen.



La nova suprastonza dalla Giuventetgna Rumantscha (GiuRu): Asa Hendry, Naomi Arpagaus, Michelle Parli, Maurus Bundi, Uolf Candrian e Vital Albin (da sen.).

Suenter ina cuorta investa ellas finanzas dalla Giuru entras Uolf Candrian e l'approbaziun dil rapport da revisiun da Fabian Augustin e Silvio Caprez eis ei stau temps per las elecziuns e reelecziuns da suprastont(a)s.

Swen Gaberthüel ch'era deplorabla-mein uonn buca presents alla radunonza ha gia ils davos meins buca pli saviu prender part dallas sesidas naven da Losanna. Quei ha menau el alla decisiun ch'ei seigi meglier da surdar siu post da cassier. Dil-tut vegn el denton buca a svanir ord nosta famiglia, el remplazza numnadamein Fabian Augustin ch'era activs dapi 2009 sco revisur dalla Giuru. Era Leander Albin ha priu cumiau da siu post ella suprastonza. El era entras a Valchava igl onn 2016 sco assessur en suprastonza. El num dalla suprastonza engraziun nus zun fetg per vies engaschi e pil bi temps che nus havein astgau passentar ensem en suprastonza. Vossas ideas han enrihiu la cuminonza giuvenila romontscha. Da cor giavischein nus bia success e plascher per tut quei che spetga vus.

Uolf Candrian ei per sedeclaras prompts da star a disposiziun per ina reelecziun suenter far attent sin sfidas ch'ei vali da surmuntar. Grazia ad ina discussiun viva e creativa sco era entgens plaidas da curascha e fidonza digl auditori vegn el a cuntinuar sia lavur al tgamun dalla Giuru, per la quala el ha gia mussau bia engaschi. Beneventar niev en nosta suprastonza astgein nus dus Lumnezians, numnadamein Vital Albin da Tersnau che surpren el post da cassier ed Asa Hendry da Vella sco assessura. A nos novs suprastonts giavischein nus biaras ideas creativas, slontsch per la lavur volontaria e bia

plascher dalla cuminonza. La suprastonza actuala secumpona pia puspei da sis persunas: Asa Hendry sco assessura, Naomi Arpagaus sco assessura e redactura dallas Vuschs Giuvnas, Michelle Parli sco actuara, Maurus Bundi sco vicepresidente, Uolf Candrian sco president e Vital Albin sco cassier (silla fotografia da seniester a dretg).

Sper dus ulteriurs inscunters intereuropeics en Pologna ed ella Russia fa il giubileum da 100 onns Lia Rumantscha, ch'ha liug igl uost a Zuoz, ora ina gronda part dil program digl onn 2019 per la Giuru. Informau da quei eveniment han gest Martin Gabriel e Gianna Olinda Cadonau ch'han representau la Lia Rumantscha a nosta radunonza. Saver quintar els sper Gabriela Cabalzar-Lombriser, la promotura dalla lavur da giuventetgna Cadi, sco hospes ei ina grond'honor per la Giuru. Sonda, ils 10 d'uost surpren la Giuru a Zuoz il program dil gi da brat intereuropeic ensem cun la YEN e l'uniun Cultura Ballape Rumantscha (CBR). Plinavon essan nus en collavuraziun cun RTR pertuccon il project da nosaistorgia.ch, vegnin a visitar ina scola superiura per far attent sin nossas purschidas e se-spruein da puder tarmetter in u l'auter commember ad in camp intercultural da «Building Walls – Breaking Walls» che riguarda uonn per l'emprema gada era la Rumantschia cun menar atras in camp ella Val Müstair dils 9 entochen ils 17 da zercladur 2019. Ideal füss sch'ins vegness da mantener quei eveniment el Grischun cun agid da giuvens indigens che fuorman egl avegnir quei camp tenor lur idea tgei maletg ch'ils participonts e las participontas irlandesas, palestinesas ed israelitas duein survegnir da nies Grischun triling.

Varga duas uras ha la radunonza generala dalla Giuru cuzzau questa gada. Aschia han tut ils presents selegrau sin ina caudla suppa da giutta ed in bi concert en atmosfera familiara dalla giuvna surmirana Saskia Demarmels ch'ha cantau ed accumpignau sesezza culla ghitarra. Cuntuns calms e maguns cuntentai ei in'ulteriura radunonza reussida.

Il protocol vegn el decuors digl onn publicaus sin nosta pagina d'internet nua ch'ins anfla gia uss il fegllet cun tuts events egl'exteriur digl onn 2019 ed ils datums. Quei fegllet san ins bugen era empustar cun in sempel mail a giuru@giuru.ch, l'adressa nua ch'ins po adina bugen era tarmetter atgnas contribuziuns per las Vuschs Giuvnas. Text da Naomi Arpagaus



La delegaziun dalla Giuru Asa Hendry, Leta Arpagaus ed Angelica Augustin cun la presidenta dalla YEN Giuanna Beeli (seniester).

Ina delegaziun dalla Giuru ella Transilvania

■ Il seminari da Pastgas dalla YEN (Youth of European Nationalities) ha giu liug quest onn a Sfântu Gheorghe ella Rumenia. Era ina delegaziun dalla Giuru ei stada dalla partida. Leta Arpagaus, Angelica Augustin ed jeu havein passentau in'entir jamna cun curonta auters giuvenils da differentas minoritads dall'entir Europa en in pign hotel ella Transilvania. Vampirs havein nus buca entupau, persunter havein nus scuvretg la minoritad ungaresa ella Rumenia. Ils workshops dall'jamna ein cunzun stai dedicati alla protecciun dils dretgs da minoritads e la participaziun dalla giuventetgna en decisiuns politicas. Nus havein empriu d'enconuscher la scala da participaziun cun quella ch'ins sa mesirar cun fetg che giuvenils vegnan cumpigliai en decisiuns politicas. Sil scalem il pli bass anflan ins la manipulaziun dalla giuventetgna ed il maldiever da duvra ella sco decoraziun per exempel per campagnas d'elecziun. Sil scalem il pli ault sesanfla la participaziun directa a decisiuns politicas senza animaziun da carschi. La YEN funcziuna tenor quei principi, sco nus havein saviu endriescher alla radunonza generala il davos di dall'jamna. Las delegaziuns dallas differentas organizaziuns da giuventetgna dallas minoritads europeicas han saviu vuschar e decider davart organizaziuns ch'han candidau per in commemorativ tier la YEN. Plinavon havein nus era saviu proponer ed eleger candidats e candidatas per ils posts libers ella suprastonza dalla YEN. La radunonza generala ha cuzzau igl entir di. In di stentus, denton era fetg interessant damai che nus havein survegniu in'investa co talas organizaziuns funcziunan.

In auter di havein nus denton era inscuntrau ils scalems pli bass dalla scala da

participaziun da giuventetgna. Alla fin dils workshops ha ei dau sesidas da dialogs cun stakeholders dalla politica. Nus havein giu la pusseivladad da discuerer cun els davart tematicas da minoritads. In dils politichers ha nezegiau la caschun ed ha priu cun el ses fotograf. Suenter siu plaid d'introducziun, nua ch'igl ei vegniu fatg husliamein fotografias, ha el pachetau ensem sias caussas ed ei svanius avon che l'emprema runda da dialog ha insumma entschiet. Els discuers havein nus era scuvretg las differentas vestas ch'ils politichers han davart la giuventetgna e la tematica da minoritads. Dus da quater politichers han insumma gnanc priu serius nossas damondas, mo-bein semplamein raquintau dad els sez. Tier la domanda co els lavurien ensem cun las 18 autras minoritads dalla Rumenia han els scurlau il tgau e manegiau ch'ei rendi buca da sustener tut quellas. Nus havein denton era fatg ina fetg buna experientscha cun Frédéric Piccavet. El ha tedlau tier a nus activamein ed ha rispundiu nossas damondas a moda constructiva. Cuzun ha el era susteniu ed encurasciau nus da daventar politicamein actives. La finala eran nus denton tuts dil meini ch'ils dialogs ein stai ina fetg buna experientscha. Empriu havein nus en mintga cass ina massa.

Suenter in'jamna pleina ed intensiva havein nus priu il tren da notg per viagiare avon ella Svizra. Avon ch'ir a casa havein duas da nus treis denton aunc fatg ina viseta a Bucarest. In marcu dad ault cun in traffic selvadi en midada constanta. Staunclas essan nus caminadas tras las vias. Il vargau socialistic dalla Rumenia ei aunc clar vesibels. Il proxim di el tren havein nus denton era giu peda igl entir suentermezdi tochen ch'igl ei vegniu stgir da mirar guadora e contempor las cuntradas. Plastic e rumien ei in ver problem, per reciclar manca l'infra-structura. Perquei vesan ins muntaneras da nuorsas cun lur pasturs che pasculeschan sin las pastiras tschuffas e ston beiber ord dutgs e flums ch'ei medemamein pertuccai dalla polluziun. Nus havein denton era traversau cuntradas vastas nua ch'ins ha mo viu cheu e leu in vitget nua ch'il fem sesalzava ruasseivla-mein ord ils tgamins e gaglans els curtgens gronds. Il tren ha duvrau scheniv uras entochen che nus essan finalmein arrivadas a Vienna nua che nus havein aunc inagada midau tren per las proximas siat uras entochen Sargans. Cu nus havein viu il Calanda ed essan arrivadas a Cuera havein nus buca pli saviu co seser ed essan ballontschadas levgiadas cun in scados plein novas experienzas ed ina munconza da sien da pliras notgs ora ell'aria frestga dil Grischun. Asa Hendry

Maila cotschna

Raquint da cuntinuaziun (2)

■ Puspè passa in grond camiu. Ella prenda en mira la tavla en cabina cun si il num dal manischnunz. Rene. Senza aigu. Cun tutta forza tira ella il minz dal mail envers la noda. Plocc. Ina pitschna gruppa da scolars che passa gist guarda cun eglgs gronds e ri lura da schupper. Ella fa ina tschera seriosa sco sche tut quai na pertutgass betg ella. «Uffants dal huz», sdiavla il manischnunz dal camiu da finestra or. Cura ch'il camiu en passà sfrigna ella cuntenta. Ella studegia dad ir giu en il Coop per in proxim mail.

Ella prenda la stgala rullanta ed entra en il labirint che sa stenda sut la staziun principala. In cuvel gigantesc sromà en tuttas direcziuns, cun bratscha lunga musculus en las qualas ils binaris sa filan sco in sistem d'avainas. Las stizuns tatgan a l'ur da questa roma sco pitschens gnies u zups da nuschs ch'in stgilat ha piazzà cun sistem u ord spira casualitad in sper l'auter. Ella entra en il zup da nuschs cun

la megra maila e va tar la partiziun da fritgs. Là sa mantun'la, la maila. Quella da Boscop en cotschen u verd, ma per il solit memia lom, Jonagold sco colorà dal tramunt, Braeburn dulutsch e frestg, Gala sco da farina e Golden delicious grond ed empermettent, ma en general plitost dischillusiunant. Ella avess da prender in da tut quella maila da la Svizra, la schelta è gronda. Bio, social, fair e tut. Ma ella sa: Maila cotschna vesa ora bain, ma n'èn betg tge ch'ella para. Ella prenda adina ils mails verds. Ses maun tschiffa en il regal da maila, dretg sper ils boscops cotschens. Granny Smith, straverd, importà da l'Australia cun fermativa en ils Emirats. Ils pli aschs, quels che paran il pli toxic. Là san ins tge ch'ins chatta. Morder en il mail asch, din ins giu qua. Quai na la para betg adattà. Morder tras è quai ch'ella fa.

Ses telefonin schuschura. «Hey!», stat ti scrit. In segund messadi: «Nua ès?» e

lura gist anc in terz: «Hai huaa lungurus...» Ella sfrigna, prenda il mail en bucca e cumenza a tippar cun omadus mauns, cun ils poleschs: «Sun el Coop, hai mancantà il tren. Ma forsà vom jau tutina anc.» Il messadi fa in «fuut» cura ch'el sa fa sin viadi. La risposta vegn immediat: «Granny smith?;-)» Ella prenda ina murdida e trametta enavos in polesch auzà. Lura tschenta ella il mail sin la stadaira e smatga il 92. Ella tatga il tagader che la maschina spida ora sin la palma-maun e prenda puspè en bucca il mail. «Ès en biro?», tippescha ella. «Positiv. Stoss anc spetgar exact 47 min.». Ed ina secunda pli tard: «Tge fas questa saira?»

Ell'è arrivada tar la cassa. «Spetga stoss pajar spert», tippescha ella cun omadus mauns. Lura tegna ella vi il maun cun il tagader a la cassiera.

Cuntinuaziun suonda
Viola Pfeiffer

